

Date – 30/03/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizoram aiawha Parliament In pakhat zawk Lok Sabha-a thu tur member pakhat thlanna kal chho mekah chuh tuma hming pe lut inhnukdawk an awm lo.
2. Mizo zinga All India Radio Top Graded Artist awmchhun Vanhlupuii chu tukin dar 2 khan kum 77 mi niin a thi.
3. Lairam Democratic Progressive Alliance chuan hun rei loteah LADC sorkar nghelnghet leh langtlang, mipui sawrkar a din theih ngei an beisei tih an sawi.
4. Prime Minister Narendra Modi-a'n Prime Minister hlui PV Narasimha Rao-a Bharat Ratna hlan a ni chu lawmpuina thu a thawn.



FINAL MP CANDIDATES

Mizoram aiawha Parliament In pakhat zawk Lok Sabha-a thu tur member pakhat thlanna kal chho mekah chuh tuma hming pe lutte tana inhnukdawh theih hun hnunung ber vawiin chawhnu dar 3 thleng khan in inthlan chuh tum zingah tumah inhnukdawk an awm lo.

Lok Sabha, inthlanpuiah hian Mizoram pum hi Parliamentary Constituency 1 a ni a, inthlan chuhtu mi 6 an awm a, an zingah hian hmeichhia 1 awmin, Independent-a ding mi 1 a awm bawk.

Lok Sabha inthlan, 2024 chuhtu candidate te chu - Indian National Congress (INC) party candidate Pu Lalabiakzama; Bharatya Janata Party (BJP) candidate Pu Vanlalhmuaka; Mizo National Front (MNF) party candidate Pu K. Vanlalvena; Zoram People's Movement (ZPM) candidate

Pu Richard Vanlalmangaiha; Mizoram People's Conference (MPC) candidate Pi Rita Malsawmi te bakah Independent-a ding Pu Lalhriatrenga Chhangte te an ni.

Puan tawh angin tun tum Lok Sabha inthlan chuh tumte zingah hian Congress party candidate Pu Lalbiakzama a hausa ber a. Nomination a theh luh ruala affidavit a theh luh telah chuan khawih chet theih thil Cheng vaibelchhe 1-a hlu a neih laiin khawih chet theih loh thil Cheng vaibelchhe 2 leh Nuai 80 a nei a. A nupuiin khawih chet theih thil Cheng 4,790 hu a nei a, a chhungkaw dang a chenpuite'n khawih chet theih thil an neih belhkhawm hlut zawng chu Cheng Nuai 7 Sing 4 leh Sang 1 a ni.

Hausa ber dawttu chu Independent candidate Lalhriatrenga Chhangte a ni a. A nupui ram neih hlut zawng nena chhut chuan a thil neih zawng zawng hlut zawng hi Cheng vaibelchhe 2 leh Nuai 7 chuang a ni. A pathumna chu Rajya Sabha MP ni lai MNF candidate Pu K. Vanlalvena a ni a. Lak sawn theih thil Cheng Nuai 58 Sing 3 leh Sang 6 hu a neih laiin lak sawn theih loh ro, Cheng vaibelchhe 1 leh Nuai 24 hu a nei a ni. ZPM candidate Richard Vanlalmangaiha chu palina niin lak sawn theih thil Cheng Nuai 97 Sing 7 leh Sang 4 a neih bakah lak sawn theih loh ro, Cheng Nuai 70 a nei a, a belhkhawm chu Cheng vaibelchhe 1 leh Nuai 67 a ni. Hmeichhe candidate awm chhun Pi Rita Malsawmi (MPC) chuan laksawn theih chi Cheng Nuai 16 leh Sing 6 hu thil a nei a. A rethei ber chu BJP candidate Pu Vanlalhmuaka chuan thil khawih chet theih Cheng Nuai 11 leh Sing 3 man a nei a ni.

Mizoram Lok Sabha member thlanna hnunung ber kum 2019-ah khan candidate mi paruk bawk an awm a; candidate an tam ber tum kum 1991-ah khan mi pasarih an awm a, Mizoram state a nih hnua candidate an tlem ber tum kum 2004-ah khan mi pathum an awm a. Mizoram state a nih hma kum 1980 khan candidate mi pahnih chiah an lo awm tawh a ni.

<><><>

AIR TOP GRADED ARTISTE VANHLUPUII PASSED AWAY

Mizo zinga All India Radio Top Graded Artist awmchhun Vanhlupuii chu tukin dar 2 khan kum 77 mi niin a thi a, vawiin chawhnu dar 1 khan Aizawla Dawrpui Mutipurpose Hall-ah vui a ni.

Chief Minister Pu Lalduhoma chuan Pi Vanhlupuii a ui thu hi Vantlang Auhmun-ah tarlangin, Zofate tan channa nasa tak a ni, a ti a. A kalsan tak a chhungte Pathianin awmpui se a duh thu a tarlang bawk. Home Minister Pu K. Sapdanga pawhin Facebook-ah a ui thu ziakin,

Mizoin ro hlu a chan thu leh a sulhnute chu hriatreng a nih tawh tur thu a sawi ve bawk.

Vanhlupui vuinaah hian All India Radio Aizawl Station Director leh Cluster Head, Pu DR Lalropuia pawhin thu sawiin, Zofate zinga All India Radio top graded artist thlah liam a ni ta mai chu All India Radio-a thawktuten an uiin an hre reng dawn a ni, a ti a. Vanhlupuii chu August ni 19, 1999-ah All India Radio Top Graded Artist-a hlan kai a nih thu leh Pu C. Lalkhawliana'n Pi Vanhlupuii puala hla a phuah sak 'Thuva awmhar' hla amah ngeiin a sak chuan sang takah Zofate zinga a rawn vawrh chho leh thu a sawi a. Vanhlupuii hi All India Radio-a hla 230 record thei a nih thu leh a hla record zinga 174 te chu Pathian hla a nih thu a sawi a ni.

Vanhlupuii hi kum 1946 July ni 2 khan hla phuah thiam Vankhama leh Pi Laldengi te inkarah Dawrpui veng, Aizawlah a lo piang a. Kum 1973 March ni 14-ah Lalthuama nen inneiin fapa 1 leh fanu 2 an nei a. Dawrpui Veng, Aizawl, Vankhama Building-ah an cheng a ni.

Vanhlupuii hi kum 1950 vel atangin a zai tan a. Zaithiam avanga ram hrang hrang fang kual tawh, zai intihsiakah pawh lawmman pakhatna vawi tam lo la tawh a ni. Kum 1957 atangin Radio-ah hla a record tan a, kum 1969-ah Grade 'A'-ah a kai chho a. Mizo zaithiam zingah All India Radio (AIR) Top Grade Artiste awmchhun a ni zui a. A khawvel zinkawng a zawh tawp thlengin Mizo zinga Top Grade Artiste awmchhun a ni ta a ni. Vanhlupuii hi Northeast-a AIR Top Grade Artist pathum awm zinga mi a ni a, an zinga pakhat hi kum 2011 khan a boral tawh a ni.

Vanhlupuii hi kumin February ni 22 khan a chauh deuh thut avangin Aizawla Ebenezer Hospital-ah luhpui a ni a. Rang takin an lo enkawl nghal a, dialysis te tih niin a hnuah chuan a harh tha viau a, a taksa peng pawimawhho pawh an tha viau niin an sawi. Mahse, March ni 26 vel atangin khan a chau leh thut a, CT Scan result atangin stroke a nei tih hmuhchhuah a ni a. March ni 29 khan ICU-ah bawk dah luh niin Thawkna Khawl hmanga thawktir a ni a; a BP te a tha viau a, a that leh mai beisei a nih laiin tukin khawvar hma khan chatuan ram a pan ta a ni.

Vanhlupuii pual hian Akashvani Aizawl chuan zanin dar 7.15 atanga dar 8 thleng hun a hmang dawn a ni.

<><><>

SIAHA DEO VISITS POLLING STATIONS

Member of Parliament (Lok Sabha) inthlanpui atana inbuatsaihna kal zelah vawin khan District Election Officer, Pu VL Hruaizela Khiangte kaihruiin Siaha khaw pawna awm - Noaotlah, Lobo leh Chhaolo khuaa Polling Station-te thlawh a ni a, Siaha SP leh Dy. SP te, SDC leh DIPRO te'n an tawiam.

DEO Pu VL Hruaizela Khiangte chuan Member of District Council (MDC) inthlanah vote tla a tha thin hle a, MLA-ah tlemin a chhe leh deuh

a, MP Election-ah vote tla a hniam fal hle thin a, theihtawp chhuaha hma lak a tul hle, a ti a. A bikin MLA leh MP inthlanah Election Commission of India phut chin phak a ni lo hle thin a, kumin inthlanpuiah chuan mipui tam zawkin vote an thlak theuh theih nan hmalak mek zel a ni, a ti a. Block Level Officer (BLO) leh Village Council Member-te chu theihtawp chhuahpui turin a sawm a, vote thlak ni hma ngeia khawtlang tlangau kaltlanga vote thlak ngei tura ngenna mipuite hnena lo puang zar turin a chah a ni.

Pu VL Hruaizela Khiangte chuan vote thlak chu khua leh tui tha ten an tih tur pawimawh tak pakhat a ni, a ti a. Vote thlak ni tura duan ni April ni 19 zing dar 7 atangin vote thlak tan a ni dawn tih sawiin, huan leh ram lama hnathawk thinte pawhin an hnaa an kal hma ngeia vote an thlak theih nan a tul anga hma lo la turin BLO leh VC-te a chah a. India rama rorelna sang ber Parliament- a mipuiten an aiawh an thlanchhuahna pawimawh tak a nih angin, mipuiten an duh zawng tak an thlan tlin theihna turin District Election Official-ten theihtawp an chhuah a ni tih sawiin, BLO leh VC-ten an phak leh theih chin chinah thahnemngai taka tan lo la turin a sawm bawk.

Pu K.L. Vulmawia, Superintendent of Police chuan inthlanna felfai leh thianghlim tak awm turin Police Department-in Dan leh thupek an kengkawh mek tih a sawi a. Mipuiten ralmuang taka vote an thlak theihna turin hmalak mek zel a ni a, ECI-in a phut ang thlapin dan leh thupek an kengkawh dawn tih sawiin theihtawpa lo tawiawm turin mipui a ngen a ni.

District Bawrhsap Pu VL Hruaizela Khiangte leh SP Pu KL Vulmawia te hian Chhaolo khuaa Mara Student's Organization (MSO) General Conference vawi- 40 hmanna tur 'Pandal' sak mek an tlawh nghal a. MSO hruaituten General Conference atana mamawh an lo thlente chu tihhlawhtinsak ngei an tum thu an sawi a. Chhaolo Primary Health Centre (PHC) pawh an tlawh nghal bawk.

<><><>

LDPA PRESS RELEASE

Lai Autonomous District Council (LADC) sorkarin buaina a tawh chungchangah Lairam Democratic Progressive Alliance (LDPA) chuan wawiin khan thuchhuah an siam.

LDPA chuan LADC sorkarin harsatna a tawh dan leh hun rei lote-ah Sorkar ngelnghet leh langtlang, mipui sawrkar din an inbeisei tih an thuchhuah siamah hian an tarlang a. LADC term kal laia seat 25 awmnaah MNF-in seat 20 an lak thu leh CEM Pu Manghmunga Chinzah kaihhruai sorkar an din thu te, MNF Legislature Party chhungah inphiarrukna a awm avanga sorkar ding lai chu paih thlak a nih hnuaah MNF Legislature Party Pu V. Zirsanga kaihhruai sorkar din a nih leh thu te bakah MNF MDC zingah inthliarhranna a nasa viau tih an thuchhuah siamah hian tarlangin, eiruk thubuaiah CEM ni lai chu vanduaithlak takin Court-in

thiam loh a chantir a, mipuite zahna nen mahni inthiamlohna neia CEM atanga bang tura an beisei laiin a ban tak mai loh avang te, MNF Party atanga hmalakna a awm loh avangin Party hrang hranga MDC 13-te chuan CEM-in thlawptu a ngah tawk lo tih Mizoram Larsap hnenah an thlen tih an sawi a. LADC-a Floor test neih tura ruahman a nih laiin CEM chuan banna thehlutin, hetihlai vek hian Lairam Democratic Progressive Alliance (LDPA) lama MDC pakhat chu lehlamah a pen tak vangin MDC 12 ve ve neiin sorkar a ding thei ta lova, LADC thuneihna chu Governor-in a laksak ta a ni, an ti.

CEM chuan a ban hma leh thlawptu member a ngah tawh lo chungin hna nghet 20 dawn lai a la tih an thuchhuahah hian tarlangin pawl an tih thu an sawi a; hun reiloteah sawrkar nghelnghet leh langtlang, mipui sawrkar a din theih ngei an beisei tih an thuchhuah siamah hian an tarlang a ni.



PM MODI CONGRATS

Prime Minister Narendra Modi-a'n Prime Minister hlui PV Narasimha Rao-a Bharat Ratna hlan a ni chu lawmpuina thu a thawn.

PM Modi-a chuan PV Narasimha Rao-a'n India tana a lo thawh tawhna zawng zawngah India mipuite an lawm em a, an ngaihlu hle bawk a ni, a ti a. Bharat Ratna a dawng chu thinlung takin an chhuang a an lawmpui hle bawk a ni, tiin Vantlang Auhmun (social media) kal tlangin lawmpuina thu a thawn a ni.

Prime Minister Modi-a hian hun kal tawha Bhrat Ratna lo dawng tawhtu Prime Minister hlui Chaudhary Charan Singh-a pawh a lawmpui thu thawnin Pu Charan Singh-a'n India tana hmasawna tam tak, lo neih leh thingtlang hmasawna lama a lo thawh hlawk avangin ramim hmasawna hmel a lo hmu thei chu a lawmawm em em a ni, a ti a. Heng thilte hi mi dangte tiphurtu leh thawhrimna nen chuan engkim a tih theih zia mi dangte hriattirtu a nih a beiseiawm, a ti.

